

史料旬刊

第三十五期

清道光朝密奏專號第一



中華民國二十年五月十一日出版

史料旬刊第三十五期

編輯所 故宮博物院文獻館

發行所 神武門外發售室

印刷所 京華印書局



		郵費		價目表	
		外埠	國內	每旬一冊	每冊
本市	每期一角	外埠	國內	四角	四角
	每期二角	外埠	國內	六元五角	六元五角
上海	每期一角	外埠	國內	四角	四角
天津	每期一角	外埠	國內	四角	四角
				預定半年	十八冊
				預定全年	三十六冊
				十二元	十二元

本院發寄刊物均交郵局掛號遞送以免遺失

商務印書館 中華書局

文明書局 世界書局及

其他各大書店均有代售

史料旬刊第三十五期目錄

清道光朝留中密奏專號第一 原件藏永壽宮

(一) 鄧廷楨 片三

(二) 林則徐

附程喬采摺一片七

(三) 琦善 摺一片二

(四) 祁 瑣 摺一片一

(五) 耆 英 附黃恩彤摺三片十三

(六) 奕山 隆文 楊芳 阿精 阿祁 瑣 怡良 裕瑞 等 片一

(七) 楊 芳 片二

(八) 梁章鉅 摺二

(九) 黃爵滋 摺一

清道光朝留中密奏專號第一

按此項摺片原藏永壽宮木箱中點查號碼金字一三〇二都為一百餘通皆係清道光中晚年各疆吏密奏之留中者時值海禁大開外侮日亟內患方萌而國情朝政猶尙秘密諱飾對內則民可使由不可使知對外始而妄自尊大繼且畏葸諂媚棄地喪權遺禍至今用亟付鈔彙以專號以備研究清季史料之助惟附片首尾類多不具銜名不書年月其為何人何時所奏原夾之摺已佚不復可考間有道光硃筆書其名於簡端可知其為何人所奏者特加彙輯并略系其人歷官年月以供參考其未經標出者題名暫闕

統附刊末另俟學者之考訂

鄧廷楨

字懈筠江蘇江甯人嘉慶六年進士十五年授臺灣道缺知府浙江巡撫蔣攸銛請留浙補寧波丁母憂服闋補陝西延安府二十五年擢

湖北按察使道光元年遷江西布政使以前在西安失察奪職四年擢陝西按察使遷布政使六年擢安徽巡撫十五年擢兩廣總督十九年十二月調閩浙總督二十三年九月以廷楨在粵辦理不善與林則徐同革職二十一年戌伊犁二十三年釋還尋授甘肅布政使二十五年擢陝西巡撫署陝西

甘總督二十六年卒於官

片一

臣鄧廷楨跪奏竊照廣東地號巖疆民情囂動北則猺山逼處南則黎峒雜居兼之黃埔澳門夷船往來貿易兵防戰備不可一日稍疎現在各路官兵雖經加勁訓練而遇事調遣必須將領得人伏查本省各鎮總兵戰將絕少即副參內亦鮮曾經行陣之員從前廣州協副將郭宏升帶兵最爲得力經臣保舉堪勝總兵已蒙恩擢授浙江衢州鎮此外則臣標中軍副將達里保於嘉慶年間由藍翎侍衛出師陝省打仗著勞該員營伍老成任事勇敢遇有緩急較爲可靠現在經臣保舉堪勝陸路總兵並派委伴送暹羅國貢使進京併案給咨赴部引見如蒙聖恩記名惟有仰懇逾格鴻施遇有廣東總兵缺出再賜簡放俾粵東多一干城之選而臣亦收指臂之效感戴恩慈實無紀極臣不揣冒昧謹附片密陳伏祈聖鑒謹奏

片二

臣鄧廷楨跪奏竊照廣東地處邊陲民情囂動猺居其北黎處於南兼之黃埔澳門爲夷船聚集之所兵防戰備不可不預籌於無事之時現在陸路各鎮總

兵絕少戰將即副參內亦少曾經行陣之員前因臣標中軍副將達里保保舉堪勝陸路總兵送部引見經臣於上年十二月二十三日附片密陳籲懇恩施遇有廣東總兵缺出再賜簡放在案茲准部咨達里保已於上年十二月二十六日奉旨補授湖北宜昌鎮總兵當即欽遵行知伏念總兵爲專閫大員臣何敢妄有陳請惟緩急事所時有將材必當預儲從前廣東副將內惟郭宏升達里保二員曾歷戎行奮勇誠實茲已先後蒙恩簡放衢州宜昌等鎮而本省現任總兵內如潮州鎮李廷鈺高州鎮張青雲雖皆老成幹練習於操防而未經出師竊慮於戰陣機宜不能動中竅要伏查上年十二月二十日承准軍機大臣字寄奉上諭朕連日召見南韶連鎮總兵穆奠邦詢事考言察其爲人心地甚不誠實該督務當於該員抵任後留心體察不可受其蒙蔽儻該總兵稍有不妥之處即據實參奏毋得遷就將此諭令知之欽此該總兵現雖尙未到任惟查係河標出身責在修防與各營專重操巡者已屬有間况南韶一鎮地居省會上游訓練巡查亟須整頓斷不容因循虛誕致悞事機臣再四思維可否仰乞聖恩於郭宏升達里保二員內特簡一員調補南韶連鎮總兵則平時簡

練既可得人有事調遣亦能得力感戴鴻慈實無涯量其穆奠邦應如何調補之處恭候欽定臣爲邊疆武備需人起見不揣冒昧謹附片密陳請旨伏祈聖鑒謹奏

片

二按此片道光硃書鄧廷楨琦善二名當係合奏爲二十年事

再向例拿獲鴉片煙土計數至五千斤方得保奏原以從前爲害尙淺情形與今不同無如流毒日甚故卽興販吸食各項罪名屢次加嚴未嘗稍拘成例而查緝亦倍難於往昔其弊竇不勝枚舉今就臣愚所及知者不敢不密陳聖鑒查鴉片向祇計兩發賣不以斤計販囤多係奸商巨猾其在天津開設洋貨行棧者復皆閩廣客民歷年久而人數亦衆住居又在城外濱臨諸沽相距洋船甚近若輩誼關鄉梓因之表裏爲奸不但素相交易及吸食之人樂其利而圖其煙即擔夫豎子亦以有可傭趁鮮不利其船之紛至沓來他如守口之家丁包庇之兵役始則相與賄通繼更虞其反噬其中縱有素未交通以及無賴之徒又恐報官未必能邀重賞因或逕取其煙轉售肥己或即藉爲訛索地步是

以種種情形非惟未肯力破其奸且一聞查拿轉爲多方走漏再則鴉片雖不納課惟以獲利較優奸犯計圖夾帶故到來之洋船多而其他洋貨亦多若煙禁嚴則船來必少管理關務與地方文武各官非不思凜遵諭旨偵緝如無所屬丁役或恐短課累官或恐激之成事故雖有緝拿之員亦幾成孤立之勢况洋船百餘隻水手數千無論性多獷悍天津並無水師難以按船搜捕卽存城兵不滿千除防守城池倉庫監獄之外僅數百名尙有差操催漕各事亦焉能就洋貨街挨戶搜查是以臣日夜焦思其勢雖固結已深未便過形操切而國計民生之所係偵緝實不容再緩計惟有不動聲色設法誘買相機伺拿故均密行咨札鹽政鎮道囑其各自設法查緝無庸彼此相商並諄飭委員營縣重價誘買嚴伺携帶無論多寡但有犯者立即拿獲解省追究一面將鋪面查封倘有包庇之人盡法懲治俾鋪戶咸知儆畏不敢收買則洋船無利可圖販運自少雖本年未能盡除而漸次可期肅清惟除弊必在得人誘買尤須重價該委員等及縣營此次共獲至一萬六千餘兩之多設法極艱賠累亦鉅雖未符例載之數而本年西城正指揮拿獲一案曾蒙特旨准予陞階仰見聖主於別



釐積弊之中寓以激勸微勞之意臣不勝欽服而現在所獲數且逾於彼案三十倍以外若不奏懇逾格恩施恐此後咸皆畏難臣即竭盡愚誠一人之心思耳目終慮飭緝難以得力是以不揣冒昧謹將實在下情附片密陳伏乞皇上聖鑒謹奏硃批誘買一法雖善然亦是可暫而不可久之事仍當另籌良策另有旨

林則徐

字少穆福建侯官人嘉慶十六年進士歷江西雲南鄉試遷御史出為

河南又調江甯陝西按察使遷江甯布政使父憂歸十二年補湖北巡撫十

七年正月擢湖廣總督十八年鴻臚寺卿黃爵滋請禁鴉片煙下中外大臣

義律查緝煙土驅逐鴉片呈出總督二萬餘箱並定洋商夾帶鴉片罪名責

職二十一年春予四月調兩廣總督九年九月召來京以琦善代之尋革

六年授陝西巡撫十二月仍赴江鎮海協防五年召還尋署陝甘總督二十

片一

再臣到楚後承准軍機大臣密寄奉旨察看湖北布政使張岳崧精力能否周

臣按察使程銓刑名是否諳練等因臣當將大概情形先行附片覆奏奉硃批知道了欽此臣於出奏以後仍隨時加意細爲察看張岳崧雖年越六旬而作小楷不用眼鏡遇有要事不拘早晚俱能耐勞精力似尚有餘程銓辦理本年秋審僅有改實二起例准免議其餘審辦各案罪名均無錯誤辦理疑難之案聽其辨論頗有把握於刑名自屬諳練除於清單註考外謹再附片奏聞又湖北湖南兩省學政均係新到尙未出棚開考一時無可訪查惟湖北學政方鏞初到時因沿途感冒患病正需調治旋卽漸就痊癒諒其年力方盛自易復元此後精神如何仍當隨時察看合併陳明伏祈聖鑒謹奏

片二

再臣此次親駐鎮筸體察情形酌籌控制有正摺內所未敢盡叙者謹再繕具密片爲我聖主陳之緣鎮筸地方在萬山之中其人膂力剛強而性情剽悍用之於制敵實能奮勇先聚之於平時難免恃強生事駕馭之法本較別處營伍爲難又自苗疆設立屯防以後民間田產丈出歸公專靠錢糧以資養贍所

以鳳凰廳一隅之地而兵丁練勇合計有五千餘名之多視他營不啻數倍在當時原爲懾服羣苗起見今苗民久經安貼而營屯轉成積重之形明知兵勇太多而礙難裁減若輩聚集一處角勝爭雄偶有藉端則此倡彼和若不遂意即逞忿忘生皆已習爲固然恬不知怪此次經臣抉其病根大加訓飭曉以利害禍福尙知感激涕零但易感者其心而難移者其性是以控馭之法不厭求詳臣檢查上年挾借案內欽奉上諭有人奏苗疆善後事宜一摺著訥爾經額裕泰楊芳會同詳悉妥議具奏等因欽此查原奏內有將練勇分撥三廳安置以散其勢之語此論本極扼要惟因紛紛移駐轉恐啓其疑懼之心而携帶家口盤費尤多更無所出是以訥爾經額等仍請暫循其舊臣竊思分散之法與其勒令移駐強以所不甘何如隨時差遣予以所甚願蓋該處人情粗鄙以利爲喜以有事爲榮其受病在此其得用亦在此即如徵調出師在別營視爲畏途而該處趨之恐後若尋常差使於應得錢糧之外加給薪水盤費其踴躍更不待言又其一家父子弟兄同在行伍者甚多經臣逐一查明密記底冊凡一家有數人食糧者俱暗抽一人出外差遣使之各有瞻顧仍不明示章程如

各卡堵緝私鹽各屬訪拿匪犯之類皆其所優爲者此往彼還絡繹調派似卽無形之移駐而自然之分散也現已試行派遣皆甚樂從臣仍隨地隨時嚴密查察如有未能安靜借端生事者立予重辦不稍姑息似亦控制之一道其在本處則專恃該管鎮道約束有方臣在彼詳細稽查鎮守總兵楊芳辰沉道王簡現辦營屯事務皆能秉公克己甚洽輿情就目下觀之實屬十分安靜臣仍諄囑該鎮道總須恩威兼濟嚴而不失之刻寬而不失之濫始可常服其心至該處山田礮瘠者多收成本薄而又路途險隘與別處米穀不通今年雨水調勻堪稱樂歲倘值年成荒歉各兵勇事畜無資即難保其盡能安謐查從前該處儲備銀穀歷因屯田歲租缺額各項經費不敷遂致逐漸借支無多存貯經調任撫臣裕泰奏請清查緣欸目紛繁尙未結報現在飭催該道趕緊查明不許稍有含混其應如何籌補之處容再會同撫臣訥爾經額設法籌畫另行奏辦又查該處民人近日傳播謠言謂嘉慶初年民田暫令歸公原許於三十年之後仍還民產此時年數已過應請歸還並有欲俟臣到之時聯名呈懇者臣一得訪聞卽先飭查何人倡議嚴行拿究於是其風寢息臣復於放告之時

將此事廣爲宣諭以從前苗匪四出焚殺伊等田產多爲苗佔即未佔者亦不能耕種無非四散流亡任其荒廢若不團練丁勇何以戡定頑苗若不均出屯田又何以養贍丁勇豈可於安常處順之後頓忘同仇敵愾之心轉欲自撤藩籬甘尋覆轍該民人等皆無可置喙惟是此等謠言易動鄉愚之聽臣仍諄飭該鎮道嚴密查禁倘再有以此議煽惑平民者即須嚴拿究辦總之鎮筳爲苗疆最要之區而距臣所駐之武昌省城將及二千里邊防關重實有鞭長莫及之虞惟當時刻留心並責成該鎮道務將一切情形隨時據實稟報以憑察奪至該鎮楊芳原籍貴州松桃廳距鎮筳僅百餘里於該處民情土俗洞悉無遺上年鎮筳兵勇戕害委員蘇清阿經楊芳在籍聞知即赴交界防範所全頗爲不少此次臣至鎮筳接見該鎮據稱年老耳沉恐不足以副聖慈委任臣見其精神步履均屬健旺並未衰頹惟聽言稍多之際間有一二聽得不真不過再與述說一番似無妨碍其於湖南全省營伍皆曾統轄而苗疆尤資得力自在聖明洞鑒之中此外兩省提鎮臣巡閱所至皆已屢經接見查湖南提督薛陸久歷戎行雖年越七旬而精力極健在出師自屬老手若論平時營務固不至

廢弛亦未見振作似不及湖北提督羅思舉之認真羅思舉出身雖非正路而在湖北提督任內歷十二年操守甚清能自刻苦地方文武異口同聲其所教演雜技皆有裨軍營實用而製造傷藥療治瘡疽尤爲著效士卒民人之疾皆手治之故感激者多該提督自去冬病後差瘦於前然見其上馬登山仍極輕便詢知常時在署兩脚尙繫鐵條其習勞不倦如此似營務不至廢弛至總兵中如湖南永州鎮崇福年力正強辦事頗有才幹可資整飭綏靖鎮明海外貌似屬鈍拙而營務却甚認真現雖六十六歲精神尙能貫注此次臣考校湖南營伍該鎮所轄之兵技藝最見出色是該鎮洵堪勝任惟此後精力何如仍須隨時察看又湖北鄖陽鎮滿德坤本年進京陛見回任未久其人材本屬出衆雖年逾六十而勇銳之概未衰辦理營務大段不差尙須細爲考察又宜昌鎮珠爾杭阿在楚省三十餘年情形極熟惟宜昌爲川江入楚門戶該鎮於督緝川省私鹽前此似未能盡力近日經臣嚴飭務令於銅鉛船入境之際親往督查究竟能否改觀尙須於冬令覈計功過再行據實具奏臣有考察之責總當整頓營伍不避怨嫌斷不敢稍有遷就謹將一切情形縷晰附陳伏祈聖鑒謹

奏硃批覽奏足見實心實力可嘉之至嗣後必當有加無己以副朕望至周之琦可否勝巡撫之任遇便據實密奏

片三

再臣前奏學政蔡錦泉被控未結情形欽奉硃批秉公嚴訊務得確情如該學政實有劣蹟即行奏請革職嚴加訊究若有意消弭是卿大負委任而廢國法懷之另有旨欽此仰見聖主訓誡嚴明務令秉公覈實之至意臣跪誦之下悚深汗背懍切服膺伏念臣以一介庸愚仰承委任之重凡辦一事決一獄總求上可對君父下可示吏民臣苟不公即爲公論所不許臣如廢法更爲國法所不容清夜捫心敢不兢兢自省查前任湖南學政蔡錦泉在翰林後臣十科素昧平生毫無瓜葛上年秋間臣赴湖南閱伍適准部咨以此案京控奏奉諭旨交臣審辦當於經過各屬密訪該學政考試聲名僉云去取公平並無遺議復查革員馮茂勳於被參問罪之後遣抱進京翻控如果該學政考試有弊自必舉其重者攻之且丁酉係拔貢之年尤關鉅典倘有物議更必舉發無遺即其

他一切文場如有曖昧劣蹟斷無不和盤托出之理而馮茂勳呈內並無此等重情覈其所控各款中惟考試武童兩條最爲關要如騎射改看步箭查因連旬久雨馬道被淹有教官廩保稟呈各結在卷是其不合之處轉在體恤武童非關私弊惟於翁正庠三箭不中又賞三箭據馮茂勳原詞謂因翁正庠係前署府所取案首該學政徇情錄取等語臣亦不能無疑是以於蔡錦泉所具親供疊經反覆駁詰據其堅稱委因翁正庠漢仗軒舉力足挽強念其中靶有一時之短長並因當場伏地哀求冒昧准其再射後因刀石出色是以錄取實無徇情且以現任知府求取一名文童猶必據實參奏豈有於前署知府所取之武童反爲徇情之理臣當又將該武生翁正庠提到楚北率同省城將備考驗弓馬該武生馬步各中二矢年力正強是該學政錄入武庠尙非有弊惟當場多賞三箭實屬非是臣不敢稍爲隱飾其餘供應各款除分別訊明於正摺縷晰聲叙外並據蔡錦泉親供內稱該學政在永順考舉起程馮茂勳送有程儀二百兩堅拒不收訊之馮茂勳始猶支吾迨後亦認實有其事是餽送尙能堅却似無需索可知此案於澈底查訊之後即原呈未有之情節亦皆水落石出



所有馮茂勳供詞皆伊親筆自寫不許稍有抑勒而臣明查暗訪數月之內無間昕朝設使該學政蔡錦泉果有實在劣蹟臣即未奉批諭亦必奏請革審不敢姑寬况硃批如此森嚴臣安敢存一消弭之心自于嚴譴惟思事須覈實獄貴持平凡蔡錦泉應得之咎臣俱逐一臚陳而究明實非劣蹟是以未請革審且此案本因該學政不徇情面據實奏參終致遭其反噬倘畏事者引以爲戒轉相率而隱忍不言恐於吏治場規均有關係臣不揣愚昧謹將欽奉批諭倍加兢懍緣由繕片密行覆奏伏祈聖鑒謹奏

片四

再臣前於湖南校閱案内密奏摺片仰蒙皇上包封發回封面奉有硃筆勅湖廣總督林則徐手啓封口處奉有硃押臣謹即親手密啓伏讀批諭覽奏足見實心實力可嘉之至嗣後必當有加無己以副朕望至周之琦可否勝巡撫之任遇便據實密奏欽此臣跪誦之下服膺欽懍感悚交深伏念臣渥荷厚恩畀茲重任才具愧未能報稱而心力斷不敢留餘惟有恪遵有加無己之恩諭殫

竭悃誠事事務求真實以冀仰答聖慈於萬一至周之琦向雖與臣同官翰林而未曾共辦公事今在楚北同城已逾半載隨時留心訪察知其操守清廉性情樸直於屬員不假辭色於公事不許通融或有議其太板者臣竊以爲正是好處卽其與臣議論公事亦能自抒所見不稍依阿臣轉以是重之惟其才情未能肆應似於事務殷繁之大省未必游刃有餘若在中等省分整肅吏治挽回風俗頗有確不可拔之勁當必不至廢弛聖明用爲湖北巡撫正甚合宜臣謬轄兩省事體繁多若巡撫不得力卽臣之累詎肯遷就自誤況此次手奉硃諭令臣密奏臣更無須絲毫瞻顧必應知無不言言無不盡豈容自昧天良伏思皇上嚴密飭查原要得其實在臣亦惟有據臣所見切實上陳不敢有一語假借倘周之琦此後政事別有差錯臣亦必據實密陳總不敢下徇友朋以致上負君父謹遵旨附片密奏並將發下密封內外硃筆一併恭繳伏祈聖鑒謹奏

片五

再臣伏見我皇上久道化成一切政典彛章悉秉列聖成謨以垂法守况人命至重欽恤惟刑在強盜尙有原情之條豈吸烟獨予加重之辟然目前立法以救弊法雖創而理實因天下萬世固曉然於因時制宜前聖後聖之揆一也立法嚴行恕古有明言將來尙有自首之減輕與秋審之緩決原待恩出自上聖明自有權衡現在既有黃爵滋此奏奉旨交議不獨率土周知卽詭譎萬端之夷人亦必有內奸爲之通信此議若寢則從此玩心愈甚其害更烈於前故臣愚以爲必須中外臣工併力一心誓除此害國家理財大計此時正一轉機也臣又嘗遍訪鴉片來由實皆港脚奸夷所帶與暎咭喇國之修職貢者殊不相涉不過狡黠市僧各牟各利並非有總匯之處主使之人是以從前賣於澳門迨驅之而移泊於黃浦又驅之而寄椗於零丁洋何嘗不畏法紀所可惡者內港之快蟹臺船爲之盤送耳如果內地無人吸食諒彼亦卽不來然歷年出洋之銀固已不可勝數因思茶葉大黃湖絲皆內地寶貴之物而外洋所不可一日無者聞每年出洋交易約抵七八百萬第覈其所賣之價不過與內地價同天朝四海爲家固不屑與之計較然揆諸造物好還之理似亦宜以盈補虛而

準諸物類不齊之情尤不值以貴伍賤如將售賣出洋之茶葉大黃湖絲等物倍蓰其價凡閩浙蘇皖川筵等處客商似皆無不樂從且其交易悉由洋行並不必與外夷對議每年內地收回之價值或可稍償前此之漏卮如新價定後縱有奸商跌價私賣亦總比內地之價爲昂況責成洋行自不敢聽其搶跌而內地民間日用仍照常價並不病民此係重中華之物力示洋禁之森嚴於政體似無妨礙可否仰懇皇上密敕粵省督撫海關監督察看情形會同籌議如屬可行即擬立章程請旨定奪臣愚昧之見未知是否謹附片密陳伏乞聖鑒  
謹奏

摺  
一

臣林則徐跪奏再廣東距京遙遠臣近日始閱三月邸鈔欽奉上諭嗣後拿獲吸烟人犯不准以呈繳烟具入奏其從前投首不實之犯仍著各督撫等嚴飭該地方官隨時查察如有再犯即加重治罪以杜朦混而歸覈實將此通諭知之欽此現在部文尙未行到而臣就邸報中跪誦再三仰見我皇上於爲民除

害之中示覈實戒欺之要嚴明訓飭感懷交深臣恭繹聖諭所指收繳之弊約有三端一則恐以拿獲之犯作爲自首希圖減罪也一則既繳之後官不復查聽其吸食也一則地方官塞責邀功假造烟膏烟具以滋朦混也凡此三弊皆臣所切齒痛恨矢以極力掃除者茲蒙訓諭提撕彌欽覈實從嚴之至意敢不倍加釐剔務絕根株惟是濱海愚民無知誤會近日紛紛傳播轉謂烟禁已弛有槍有土仍聽存留前此赴鄉查訪之紳耆輒被鄉民恃頑抗阻謂已奉旨免繳何得多事此等藉詞搖惑以嚴爲寬實屬詐妄之尤亟宜痛加懲創除嚴拿重辦外惟念臣等所辦收繳之法並非令罪人自行投首官不復查亦不敢聽州縣塞責邀功假造朦混伏求皇上恕臣愚昧容其據實瀝陳查鴉片久已盛行廣東尤甚所謂遍地皆是早在聖明洞鑒之中即使此後外夷斷絕來源正恐內地囤積之多數年用之不能盡在臣與督撫臣等盡力督拿無日不有獲犯起賊然察看向來陷溺之深與到處窩藏之密地方遼闊民俗兇頑島澳旣不可勝窮胥役又大都難恃是即設法拿獲亦祇千百中之什一如必掃數拿盡竊恐遙遙無期因思保甲之行本係詰奸良法每鄉總有公正紳士良善耆

民五家十家之間耳目最爲切近輿販吸食斷難瞞其鄰人故保甲有五家連坐之條在官者因即藉以儆衆如一家有犯責四家以告發否則與之同罪而爲鄰佑者既知其人有犯恐必連累及身又念比屋相親不忍遽寘於法則必多方勸戒悚惕而禁止之並取其烟槍膏土彙繳於官官則驗明即收並不詰其姓名來歷蓋明以留其廉恥而實則杜其避趨故第收之於例應舉發之族鄰而不收之於律許減輕之罪犯猶恐不實不盡一面購線查拿有犯即懲其於何人曾繳何人未繳拿者本不過問犯者無可藉詞此所以不相妨而適相濟也夫有鴉片即有吸食勢所必然在官多一分之收即在民少一分之食誠能減之又減以至於無似亦有益無損之事且吸食之人其畏收繳轉甚於畏查拿蓋查拿不能無漏網况父兄溺愛親族礙情雖恨子弟之吸烟而恐其到官問罪轉必多方爲之隱瞞有收繳之一途則凡家人骨肉戚友鄉鄰平日勸之不從者至此皆得悚以功令之嚴奪其物以祛所嗜是一人之癮衆人斷之既立死罪以懾其心復飭收繳以去其疾迫之以不得不斷之勢正所謂以生道殺民而比閭族黨間變化愧厲之方備焉保受和親之俗成焉故報繳者雖

見其多並無公然免罪之犯而報獲者並行不悖實無繳後不查之人蓋以保甲禁鴉片而寓收繳於編查猶之以保甲查教匪即應收其經卷以保甲治械鬥即應收其器械其理一也至假造之弊惟不驗乃至被蒙果其驗之則真僞判然難逃衆目故烟土必用刀剖開烟膏必以火燃試不惟全假者即時發覺即攙和者亦立見區分若烟槍則外面一觀已有生熟之別又劈破以視其內必其烟油久漬乃爲舊槍即新槍尙不得相混而他物所假更無論矣現在粵省所收膏土槍具惟僻遠隔海之雷瓊二屬爲數本少免令解省外其餘各屬悉經通飭解驗且不獨收繳者當驗而拿獲者更當驗蓋收繳無功可見惟拿獲始足見功地方官如存邀功之心則與其假造而報收繳不如假造而報拿獲之爲得也夫以粵省作僞之風命案尙有頂兇盜案亦有買犯况鴉片獲利最厚弊竇最多有賣放正犯真贓而以從犯假贓報獲者有獲時明係真贓而侵吞偷換解時變做假贓者詐僞叢生何所不至然既不能因查拿之有僞遂並查拿而停止之則收繳中之真假或亦責成臣與鄧廷楨等逐一調驗如有假造惟臣等是問查粵省自上年以來未曾於鴉片案內保舉一員是既不使

邀功安敢聽其朦混臣到粵以後疊准鄧廷楨等將解省之烟土等物移同查驗聞有一二攙和之膏土搪塞之新槍皆必剔出發司澈底究辦此後更當責成地方官先自劈驗再行封解如有不實即將該州縣嚴參示儆又如烟槍一物臣始亦以爲不過如尋常之烟桿耳斷癮與否於槍何與迨屢獲烟犯細加研訊始知溺於鴉片之人直以其槍爲性命緣新槍不能過癮總須平素用熟有烟油久漬其中者方能適口故一槍有值數十金百餘金者甚至父子兄弟間不肯相假其陷溺之深如是所以欲去其癮先去其槍有如理髮而奪其櫛作字而奪其筆雖酷嗜者亦無可如何非第使之明志志也謹查大清律例內禁止賭博必並賭具而嚴禁之蓋有具則有賭無具即無以爲賭也烟之需槍恐或類是臣前於邱鈔中見有被罪圈禁而仍羣聚吸烟者是因破案而不收槍之故若不收槍則未犯案者固難望其自燬即已犯案者仍不甘於棄槍將使在家獨吸之人合之而同吸於囹圄並將各處散吸之人徙之而聚吸於配所竊恐輾轉流傳其勢更難於禁止矣凡人不見可欲則心不動烟於入目槍入於手欲其口之不饑不可得也吸旱烟者若無烟桿亦有不能不歇之勢然



旱烟之新桿尙可將就而鴉片之新槍與無槍同由此觀之收槍之法或亦禁烟者所不廢耳至自首一節現在粵省固無其事而大清律例明有此條除殺人不准首外小而尋常罪犯大而習教爲盜尙皆准首設有人烟癮已斷本身出首察看得實似亦只得遵例辦理未便竟不准首致與定例兩岐而與怙惡不悛之人亦無區別惟流弊必須嚴杜倘州縣將拿獲之犯捏爲投首定當以故出人罪嚴行參辦而罪人首後復犯似宜即照新例定罪不得仍與初犯者同科始足以昭警戒伏念我皇上明罰勅法因恐臣工不知振作是以訓飭加嚴而無如蚩氓相率傳訛轉幸明諭之頒冀遂深藏之術若因此頓更大局非獨前功可惜更虞挽救無方且風聞外夷於呈繳之後知內地民人烟可不繳不無反脣相稽者於國體尤有關係臣仰蒙委任專辦此事下懷實深焦急不揣冒昧披瀝密陳如臣言謬妄難行應請皇上破其顛愚示以懲儆倘蒙俯念臣心無他惟冀於公有濟可否特頒申諭將前旨係爲覈實查辦正以從嚴之處明白宣示嗣後寓收繳於保甲責大吏以督查如有州縣以拿作首以假混真不行嚴參者事發以徇庇論而總不得藉口希圖免繳俾天下臣民憬然領

悟庶久藏之毒物漸收獲以無遺並請將臣奏留中毋庸發下臣既得以遵循辦理斷不敢居建白之名頂感鴻慈倍無既極再督臣鄧廷楨與臣籌議意見相同因接奉硃批令其酌覈亦已自行另片覆奏惟係專差齎遞恐到京在臣此摺之後合併聲明伏祈聖鑒訓示謹奏

片 六

再查奸夷渣頓係暎咭喇國所屬之港脚人盤踞粵省夷館歷二十年之久混號鐵頭老鼠與漢奸積慣串通鴉片之到處流行實以該夷人爲禍首伊僅係夷中之一奸販並非該國有職之人祇以狡黠性成轉恃天朝柔遠之經爲伊護符之計其因售私以致巨富人所共知道光十六年冬間即經督臣鄧廷楨等遵奉諭旨查明驅逐而該夷藉稱清理帳目又作兩載逗遛去冬臣蒙皇上發交太僕寺少卿楊殿邦等條奏各摺帶來廣東查辦其摺內所指亦以該夷人爲奸滑之尤臣於未出京時即先密遣捷足飛信赴粵查訪其人以觀動靜聞十二月間廣東省城互相傳播以爲欽差大臣一到首拿渣頓究辦該夷人

遂即請牌下澳搭船回國是其飽則颺去固爲鬼蜮常情要在使之不敢再來乃爲善策又伶仃洋面躉船亦於臣將到之時先後開動二十隻雖夷情叵測難保不游奕往來而其聞知諭旨森嚴心懷畏懼亦已明甚矣此時查辦機宜惟有外樹聲威內加慎重陽示鎮靜陰肅防維使之生嚴憚之心而發悔懼之念然後曉諭禁止皆非空言至廣東興販吸食之人固倍蓰於他省然聞皇上特遣大臣查辦皆有懼心屢經嚴拿之餘興販者不能不斂戢吸食者亦不能不戒斷惟民情因見從前旋查旋止以爲官禁未必久長不免有觀望希冀之想臣入境後聞民間無不私探罪名輕重與新例之曾否頒行大抵惟生死關頭足以生其震恐如果定論死之例而寬一年之期即吸食莫多於廣東而以臣察看情形亦可保限外無人權法若寬而生玩則不惟未戒者不戒即已戒者亦必復食稍縱即逝恐不可挽伏乞聖明乾斷嚴例早頒庶辦理得有把握臣愚昧之見是否有當謹附片密陳伏祈聖鑒謹奏硃批另有旨

片

七

按此片道光硃書林則徐程喬采二名當係則徐爲雲貴總督時與雲南巡撫程喬采所合奏喬采以道光二十年十二月署江蘇

巡撫二十一年正月護兩江總督十二月代江蘇巡撫二十二年九月  
革職十二月授廣東巡撫二十五年授漕運總督二十六年九月署江  
蘇巡撫十二月授雲南巡撫二十九年七月擢雲貴總  
督三十年十一月調湖廣總督咸豐二年九月革職

再永昌連年滋事民幾不知有官實由吏治因循以致獷悍成風積重難返上  
年甫經懲創亟須爲地擇人仰荷聖恩准以臨安府知府張亮基調補永昌府  
缺該府自到任後辦理不遺餘力於地方之利弊無不訪察周知於風俗之澆  
漓無不革除務盡如昔時牛叢香把拜會結盟歛費賽神信妖惑衆諸惡習皆  
能令行禁止杜絕根株一有勾結潛滋即被查拿懲辦又將各村寨槍礮火藥  
全行搜繳入官產硝各硃全封軍火無從私製至該處向有教演拳棒聚唱小  
說之所今則改爲義學又有糾詐大戶引誘游女之風今則嚴其鄉禁徭役之  
累民者設法裁革之道途之險巇者捐貲平治之合諸臣等正摺所陳安置回  
戶修護回墳勸售回產等事無非任勞任怨期以永杜弊端訪查彼處民情於  
該府懷畏兼深漢回如一且不獨永昌一郡如是卽附近之順甯蒙化等屬亦  
莫不然是張亮基調任年餘竟能大挽積年難挽之習臣等職司察吏似此實  
在得力知府不敢壅於上聞惟地方正當起色之時仍應責成經理將來遇有

兼轄迤西及統轄滇省之任如蒙簡畀鴻慈似張亮基皆可力圖報稱以收得人之效臣等為邊疆需才起見不揣冒昧謹合詞附片密陳是否有當伏祈聖

鑒謹奏

琦善字靜菴滿洲人由蔭生授刑部員外郎累遷通政司副使嘉慶十九年

再決奪職尋授河南按察使歷江寧河南布政使二十四年三月擢山東巡撫五年五月

擢兩江總督兼署漕運總督七年山東巡撫九年六月擢山東巡撫五年五月

調直隸二十年八月英兵尋船至海口投書請通商並訴林則徐等禁烟啓釁

琦善兼英領義律及兵官許以代奏旋授欽差大臣赴粵查辦九月署兩廣

總督兼善密與義律定議以香港易還所據礮臺同充葉爾羌幫辦大臣二

二月褫職速治論大辟尋釋之改發軍臺二十二年充葉爾羌幫辦大臣二

等侍衛充駐藏大臣統御史陳慶鏞奏債事諸臣罪狀再褫琦善職未幾予三

總督咸豐元年五月革職逮問二年發吉林効贖罪十一月署河

摺一

大學士直隸總督臣琦善跪奏為暎夷違旨起旋南旋後奉旨派臣前往廣東查辦事件謹將探詢該夷情形先行恭摺奏祈聖鑒事竊查暎夷素屬化外久

著橫名故凡海處諸邦莫不爲其所困前於本年七月間該夷膽敢駕駛兵船多隻來至天津仰蒙聖恩逾格指示先機臣得藉資領悟隨查有督標左營千總白含章心地伶俐膽力壯強節經派令前往夷船接送公文等事藉便察探該員並無寸刃隻身來往其間該夷亦頗以其敢於前行甚爲契重酬以刀槍等物均各卻辭不受而其於應接之間或剛或柔頗能隨機應變甚至故與該夷通事跟役之流佯爲戲謔以便任意誘詢到處搜翻俾得察其隱蹤該夷船身甚固非七八千斤大礮不能穿其板片其艙內住人之處均在兩旁厚積棉被以備交戰時浸溼張懸遮攔槍礮至於船身則又訊係該國產生之油木所造其性堅實而其質綿軟非杉木等類之比礮攻未能深入而該夷所帶均係銅礮檢閱礮子有重至二十八斤者轉爲我軍之所未有溯查向來破夷之法有攻其船之下層者今則該船出水處所亦經設有礮位是意在回擊也又有團練水勇穿其船底者今則白含章親見其操演水兵能於水深五六丈處持械投入海中逾時則又縱躍登舟直至顛頂是意在抵禦也又有縱火焚燒者今則該夷泊船各自相離數里不肯啣尾寄旋其風帆係白布所爲節節斷離

約長不過數尺中則橫貫漆桿藉以蟬聯非如篷筏之易於引火是意在卻避延燒也凡此皆我師從前之長策而該夷所曾經被創者茲悉見機籌備是泥恒言以圖之執成法以禦之或反中其詭計未必足以決勝且據其跟役聲稱閩粵等省擊破之船皆該夷之所謂划子船長不滿三丈除水手十餘人外僅止容納數人雖經疊次被擊從未見起獲器械蓋緣本非兵船是以並無兵器又稱該詔律等本年之來意在乞恩求請各欵初非欲圖滋擾即其占據定海亦緣先被轟擊始行回手迨見兵民逃散因即蜂擁入城其在各省遊奕亦祇圖窺探形勢熟識沙線如蒙大皇帝恩准所請該夷則仍感戴如前否則將於明歲大肆猖狂本年所來兵船僅四十隻現在測量水勢如有攔江沙者大船不能駛入復欲改造小號師船該千總答以兵船已來四十隻之多豈復尙有加增據稱該夷以一國之大頻年往來洋面且附近尙有屬國皆可調撥所有兵船何止此數各等語據該千總向臣告知臣思該國既有國王宜必以理法自繩何以不單求貿易乃致逐條求索隨復乘送給食物之便令該千總復向該夷跟役探詢其初猶囁嚅不吐迨反覆相誘始據該跟役潛向告知該國王

已物故四年並無子嗣僅存一女年未及笄卽爲今之國王該國有大族二十餘家皆其國之權臣議事另有公所祇須伊等自行商推不受約束揣其詞意或前此粵省燒燬之烟其中卽有各該權臣之物又詢以此人何不適人據稱向來該國女子許嫁均係自行選擇茲亦任其自主並稱此女尙有胞叔一人待其旣字之後其國或讓與伊叔抑或讓與他人亦復任其自便是固蠻夷之國犬羊之性初未知禮義廉恥又安知君臣上下且係年輕弱女尙待擇配則國非其國意本不在保茲疆土而其國權奸之屬祇知謀取私利更不暇計其公家縱以橫恣之故釀成傾國之災亦復罔知顧恤蓋此等權臣逞忿何事不爲故求索不專在通市又詢以該夷何不近在廣東滋鬧乃復遠遊各省據稱粵海商民因被查辦急切已甚苦累其不致激成事端者實屬大皇帝如天之福該處虎門地方我軍設有礮臺澳門爲西洋夷人住居之所彼夷亦設礮防禦自未便致乖和好推測其意似不肯傷其同類或以廣東商民與該夷通氣者多因不欲肆其擾害未必盡畏該省之防範也是該夷之兇頑梗化習與性成雖天威遠被四表無不可懾服之人而糜餉勞師究恐未能迅速蕆事故臣



反覆思維粵東既失計於前致令有所藉口定海復失守於後益使肆其鴟張此時欲期貼服實屬萬分棘手况臣機宜素昧尤覺悚惶無地惟有趕緊料理卽遵旨迅速入都跪聆聖訓俾得有所稟承謹將探詢嘆夷情形先行具奏伏乞皇上聖鑒謹奏道光二十年八月二十七日奉硃批探訪詳明可嘉之至另有旨欽此

片一

再奴才接奉寄諭以該已革諾們罕住藏掌事有年與邊外及該土司原籍聲息相通藏衛番民雜處良莠不齊該已革諾們罕甫經失勢未必無同惡相濟之人諭令奴才小心防範無任疎虞等因欽此仰見我皇上慮患防微無遠弗屆奴才不勝欽服查該已革諾們罕住藏掌事有年黨羽衆多西寧在藏貿易之人絡繹不絕其原籍洮州實屬聲息相通昨因攢昭二十餘日喇嘛衆至數萬奴才深恐其庇護黨類或有同惡相濟之人因即多方駕馭極爲安靜茲于正月二十五日大昭攢竣暫各分散待二月二十二日起又攢小昭至三月初

一日止均各歸巢終年之事即畢該已革諾們罕拘羈大昭之內邊派番目小心看管奴才仍不時訪查未敢掉以輕心至邊外各部落現俱恭順並無事故惟番目番僧雖明知其不法多端而總以其掌教有年深恐在藏地立置重典啓外番輕視佛法之漸且物傷同類亦自覺顏面攸關不免有代爲冀倖各存顧慮之心此係實在下情奴才不敢壅于上聞現仍謹遵諭旨小心防範妥爲羈縻不敢稍涉大意合併附片陳明謹奏硃批知道了

片二

再學臣徐士毅於考試關防尙知嚴密嗜酒任氣往往飲入醉鄉將士子枷責外間嘖有煩言如正月按試保甯府歲考即將廣元南江通江劍州等州縣應名稍遲之文章四百餘人逐出不准入場又將具保之廩生任情責打該府徐之銘往向勸阻而學臣已入醉鄉言莫能入似此情形恐致激成事端除諄屬各地方官遇考試時設法安撫外查考試固應嚴肅而體恤亦難偏廢臣既有所聞不敢不密行陳奏伏候聖裁謹奏

祁

墳字竹軒山西高平人嘉慶元年進士督廣西學正任滿補刑部員外郎道光四年出爲河南糧鹽道遷浙江按察使貴州布政使十年授廣西

巡撫十三年調廣東十八年召爲刑部尚書二十一年奕山督師廣東墳往治餉琦善旣黜授兩廣總督二十四年二月病免旋卒

片一

再七月二十九日臣承准軍機大臣密寄七月初六日奉上諭祁墳奏臬司宣封越南禮成一摺覽奏已悉此次廣西臬司寶清至越南宣封諭祭來往有無騷擾驛站需索該國餽送收受禮物等事著祁墳密行查訪務得實情遇有報便摺便附片登覆毋庸專摺具奏將此密諭知之欽此臣跪誦之下仰見皇上教廉勵節澄序官方之至意臣因事在隔省一時訪察難以得實又不敢以傳聞影響之辭遽行上陳當即密委誠實可靠之把總屈超羣假以查辦船料爲名前赴廣西暗中詳細密訪並於函致廣西撫臣周之琦議論屬員賢否之便詢及臬司寶清居官光景旋有臣姪婿馮鎮因在廣西昭平縣伊母舅張林任所幫辦筆墨事件於八月初間來臣署探望查昭平縣即係廣西省城前赴越南水程必由之路臣與馮鎮閒談之際問及寶清路遇時一切供應情形據云

寶臬司操守尙好路過昭平時照常供應並未格外需索惟年紀尙輕頗愛體面等語旋於九月二十八日把總屈超羣回省稟稱查寶臬司於本年三月出省連委員家人共用大小船十二號由平樂府至梧州府潯州府行走所到各府均經致送程儀臬司均未收受亦未聞委員家人等有騷擾之事惟至潯州府時署知府何鯤辦理船隻遲慢到起更後始齊備臬司甚不喜悅出關後離越南國尙有七站該國沿途驛站供應一切極爲周到禮成後該國王曾送臬司程儀二千兩及土儀十餘種臬司不肯收受卽行璧還後來國王又復送去臬司收了土儀四種詰以所收係何物件據云聞係象牙一對犀角一對及沈香尙有藥材一種不知是何藥料等語旋又接廣西撫臣周之琦函覆該臬司精明有餘涵養未足現年四十有四老成二字自未幾及平日卻不徇情面事核實詳稟毫無假借在粵西積疲之區實能相助爲理平日操守極好祇因接見屬員考問職事聲色未和每致賈怨等語臣查撫臣函覆該臬司居官及操守情形與臣問馮鎮及密委營員屈超羣訪察光景大略相同至該臬司在越南收受土儀四種則屈超羣所言似亦確實仰蒙皇上密飭查訪臣不敢稍

有欺飾謹遵旨據實繕片附報便密奏伏乞聖鑒謹奏

摺  
一

兩廣總督革職留任臣祁墳跪奏爲遵旨查明廣東水師提督吳建勳尙堪勝任並查有陞署大鵬協副將賴恩爵在水師各鎮中尤爲出色可靠恭摺密奏仰祈聖鑒事道光二十二年十月十五日臣承准軍機大臣密寄九月二十五日奉上諭現在辦理善後廣東地方水師尤爲喫重其將備能否得力船隻如何配用器械如何製造以至平日如何巡哨臨敵如何制勝全在該提督處處留心方能率屬講求力加整頓現任吳建勳朕不深悉其人是否於廣東洋面一切操防練訓駕駛攻勦事宜均能諳習著祁墳密加查看據實具奏如不能勝任卽於水師人員內就該督素所深知實在可靠者密封具奏朕爲水師得人起見且該督統轄兩省事務較繁如果提督得人卽該督亦獲收指臂之助萬不可意存遷就重孤朕望將此密諭知之欽此臣跪誦之下仰見我皇上垂念海疆慎簡將帥之至意伏查水師提督一官統轄內河外海水師各將備且

廣東自辦理夷務以來地方情形尤爲喫重現任提臣吳建勳自上年到任後臣留心察看操守極好於水師營伍情形亦極熟悉所有內河外海一切操防訓練事宜督率稽查均有條理在海疆無事之時以該提臣從容鎮撫尙堪勝任然無濟時應變之才若遇緩急不能必其奮發有爲至水師四鎮內除調補陽江鎮總兵張成龍仍在浙江黃巖鎮署任尙未到粵外其餘碣石鎮總兵李賢瓊州鎮總兵鮑起豹營務曉暢訓飭有方均堪稱職但亦祇係照常供職其才識辦事較之提臣吳建勳未有優劣惟查有陞任南澳鎮總兵賴恩爵先經奏明留署大鵬協副將駐劄九龍逼近香港係夷船聚泊往來遊奕之地該署協在九龍防堵二年有餘二十年秋冬間與夷船打仗極爲出力曾經恩賞巴圖魯名號臣到任將及二年每於該署協稟報香港夷務覘其才略似於緩急輕重之間均合機宜實水師總兵中最爲出色可靠之員若以之擢任水師提督將督修虎門礮臺工程及操練新製水師戰船責成辦理亦洵堪勝任臣仰蒙皇上天恩膺茲海疆重寄並蒙剴切訓諭臣若意存遷就仍不據實陳奏則是上孤高厚之恩下又不得指臂之助稍有人心者斷不敢出此所有遵旨查

察緣由謹附驛恭摺密奏是否有當伏乞皇上聖鑒訓示謹奏道光二十二年十一月二十日硃批另有旨

著英字介春宗室隸正藍旗以蔭生授宗人府主事累遷內閣學士兼副都

統護軍統領道光五年授內務府大臣歷工部戶部吳淞失守赴江蘇相

十四年歷工部戶部尚書差大臣督辦浙洋務五月吳淞失守赴江蘇相

年正月調廣州將軍欵者英等與英人費共查馬利遜會於江寧儀鳳門外靜海寺

五港通商等欵者英等與英人費共查馬利遜會於江寧儀鳳門外靜海寺

為城下之盟和議遂成旋授兩江總督兼辦通商事宜先是大臣赴廣東議

商章程二十四年二月調授兩廣總督兼辦通商事宜先是大臣赴廣東議

澳門貿易有定例不得擅入省城自江寧和議成省城設立棧房及入城

之約粵人持有舊例不得入城自江寧和議成省城設立棧房及入城

兩英人復約始退者英知終必有英船突開入省河要求益堅者英讓

兵部三十年文宗革職圈禁八年英法聯軍至津予侍郎銜借桂良赴津協

片一

奴才耆英跪奏再奴才前准軍機大臣字寄欽奉諭旨江浙兩省漕糧折色如何分別覈定方可便民等因欽此仰見皇上於變通盡利之中無非蘇息民生

之至意奴才愚見所及有不敢不密陳於聖主之前者竊思南漕例收本色州縣因有兌費兼收折色每石自洋銀四五元至七八元誠所不免各府各州縣情形參差不一要皆私自折收若浮勒過甚小民不甘輒有控告之事今如酌量折徵定價較輕豈不漸甦積困惟恐州縣藉口新章向日之私折者轉可明目張膽朦混影射科則既涉紛繁條理亦形瑣碎明減幾成之價值暗加一倍之折收無論米由田產銀出市沽以所有易所無小民固多虧耗而奸胥蠹役高下其手乘此紛更益滋朘削是朝廷欲紓民困之心不善奉行轉致於民不便幸而連年豐稔天庾充盈採買無庸慮及惟此奇零折派閭閻觀聽或味道適從夫民可使由不可使知與其更張而無益不若循舊以相安奴才庸愚衰邁之身當疾痛呻吟之日而拳拳報國之忱未嘗或釋倘既悉心體察仍復迴護原議隱諱不言殊失人臣勿欺之義爲此力疾據實密陳伏乞特沛綸音飭諭有漕各督撫停置折徵前議俾東南萬姓曉然知聖德如天洞燭民隱無微不至則感頌皇仁永永無極矣爲此附片密陳伏乞聖鑒謹奏



再自嘆夷犯順以來言事者紛如聚訟主戰者無不以撫爲非主撫者無不以戰爲難卽臣前在盛京將軍任內體察該處情形實有天險可恃戰雖不足守則有餘亦主戰而後撫以示恩威迨抵江寧省城目擊兇燄鴟張竟有戰守兩不足恃之勢不得不暫事羈縻以免斯民之鋒鏑然猶未能深悉夷情及閩粵江浙何致任其摧殘若是也兩月以來細加察訪又親歷京口吳淞查看副都統海齡提督陳化成盡難陣亡及前督臣牛鑑督戰之處廬舍礮臺盡成瓦礫海塘椿石亦多裂斷原設鐵礮有敲斷兩耳釘塞火門者有推墮海中者其銅礮盡爲擄去種種蹂躪情形竟致目不忍視詢之土人僉稱該逆夷船兩面排礮人藏艙底接連數船照准苗頭輪轉施放或東或西權操必中我之礮位安設礮臺塘岸雖有礮車可以推轉而究係重笨不能移動之物彼於一二十里之外可以擊我中堅我礮致遠不過數里即使對准轟擊而彼船之來係乘落潮時逆流而上風先彈至彼船即可趁風順潮以避我礮併可不致擱淺其於侵犯吳淞之時又於寶山城外沿塘一帶如大校場吳木烽天后宮小沙背石

洞等凡屬安兵設礮之處分其餘舶開礮牽制使我不暇援應是彼逸我勞彼靈我笨不能取勝並非戰之不力亦非防之不嚴不獨吳淞一口爲然卽閩廣浙江等省之失利亦無不皆然臣以所見證諸所聞忿恨之餘不禁爲陣亡殉節諸臣及被難居民痛哭也臣又按視故壘吳淞口迤南之胡巷口衣周塘江灣東溝李家廠以訖上海縣城又吳淞口迤北之大校場吳木烽天后宮小沙背石洞劉河白茆口等處以訖福山凡屬要隘無不安兵設礮勢若長蛇並非聚兵一處是前督臣等之擇地設防尙能得其要領無如地段綿長兵分則未免單弱中堅一破風鶴皆驚又無後路以致官兵遂成瓦解探聞奕經文蔚余步雲之在浙江奕山林則徐琦善之在廣東顏伯燾之在福建籌辦撫不遺餘力亦皆井井有條此中或任用失當或撫馭過柔或偏執己見或不諳兵機致都僨事前據夷酋郭仕立等向臣言及畏服林則徐辦事結實敬服琦善臨事敏捷佩服伊里布處事誠實並云皆中國好大臣臣聞之亦爲之歎服至於前督臣牛鑑亦復爲該夷等中心誠服執禮甚恭是諸臣之材識皆足以懾服外夷且數十年來仰蒙造就栽培亦未嘗不加以委任一經辦理夷務均不免

於獲罪臣撫躬自問萬無諸臣幹濟之才乃荷天恩畀以兩江重任並會辦江浙閩廣等省善後通商各事宜益覺自危而自懼也但籌辦善後首在得人而人材難得又非一二人所能集事且現在練兵鑄礮造船均應講求所關匪細而沿海各省防守事宜尤應倍加熟籌若非久任封疆多年閱歷者辦理實難期其周密今當用人之際與其將諸臣置散投閑或加重辟可否勅令戴罪圖功以贖愆尤而觀後效此外尙有素日循聲卓著爲兵民所愛戴以臣所聞如浙江寧紹台道鹿澤長前任寧波府知府鄧廷彩石浦同知舒恭受黃巖鎮標游擊林亮光江蘇鎮江府知府祥麟寶山縣知縣周恭壽署提標右營游擊事撫標參將封耀祖實心任事熟悉利弊莫不稱爲好官現在該員等均有應得之咎法立令行必應概予懲處以爲玩誤者戒惟推其失事之由實在力不能支與畏葸無能者本屬稍有區別且兵燹之後民力窮困慎選守令教育生聚尤爲緊要臣愚以用功不如用過可否仰懇皇上格外鴻慈先行明正其罰仍賜曲予矜全俾得自新有路或暫留職任或暫假以頂戴留於各省差委俟通商大局定後再行分別斥革治罪則恩出自上民順於下然後多方選擇賢明

守令勇幹營將協力同心臥薪嘗膽生聚教練日致富強庶我有長勝之方彼無罅隙可乘久安長治不外乎是惟黜陟大權非臣下所敢妄參末議祇以受恩深重目擊時艱不敢知而不言倘敢稍存見好市惠之心非獨王章所不容亦天理所不容神人且將共棄豈堪上對君父耶謹連歷年戰守情形一併冒死密陳伏乞聖鑒再鹿澤長辦理夷務已閱年餘舒恭受始終其事均爲該夷所信服此時寧波道府同時更易生手似非所宜且黃恩彤咸齡業隨伊里布同赴粵省則江浙兩省並無熟悉夷情可以駕馭夷人之員臣又未便時與接見若再另委他員恐辦理未洽另生枝節又臣一路訪詢常鎮道周頊不避嫌疑蘇松太道巫宜禊人極老成於收復各城後辦理一切事宜均能實心實力巫宜禊又能勸捐銀三十五萬五千兩發給夷船尙知愧奮合併陳明謹奏硃批覽

片三

再兩淮鹽務自道光十年總督兼管以後甫及五年而乙未一綱已據前督臣

陶澍再三奏請展分十綱帶納比經奉旨允准而丙申一綱奏銷仍將貽誤致有運司劉萬程之事是其困敝情形久邀聖鑒今距丙申之後又閱六年引滯商疲較前更甚即無上年崇陽鎮江之擾已難趕辦奏銷况復值此變故尤屬萬分竭蹶若令稍有貽誤當茲制用孔亟之時每年頓少二三百萬未免有礙度支然欲於國計無缺而又使商力不疲是非設法通融實難兩爲兼顧該運司但明倫所請奏銷如常造報先於二月報撥一半餘銀展至八月再行督商全完候撥亦係萬不得已之苦衷俾全局無虞渙散而餉課仍得解支不過稍遲數月尙非竟成無着以臣體察情形全賴該運司再三督飭各商始勉力應承現當鹽務被兵以後商情窘迫較之乙未展限之案尤屬不同若非如此從權似亦更無辦法如蒙勅部覈議在部臣職司邦賦深知措手之難自必曲意持籌以期培養元氣萬一奏經議駁尙祈鴻慈逾格出自特恩允准庶可仰副我皇上慎重齟綱保全大局之至意謹附片具奏伏乞聖鑒謹奏

兩江總督臣耆英跪奏爲密陳切要機宜冀收實效恭摺奏祈聖鑒事竊臣欽奉諭旨會同撫提諸臣籌辦善後事宜業經酌擬條款另摺恭請聖訓惟撫夷本屬權宜之計並非經久之謀此時熟籌善後原期經久而自古遠猷攘外必先安內江蘇雖稱財賦之區而賦重則民貧民貧則無恒心惟在司民牧者撫綏得宜教養有法使民各遂其生官與民有休戚相關之誼則內安而不患外侮今之牧令不理民事不問疾苦動輒與民爲難以致民情渙散內不自安何暇攘外卽如催科之術則以幫費爲名捐款爲詞假手書役任意浮收甚至每米一石收米至三石內外折錢至十千上下每銀一兩收錢至四五千文小民手胼足胝終歲勤動所得能有幾何而被朘削若此以致蘇松一帶竟有以所得不敷完納錢漕棄田不顧者設有不遵浮勒之人書役則以懲一儆百爲詞恣恫本官或指爲包攬或指爲誑交甚或捏造事端勾串棍徒憑空訐告將不遵浮勒之人橫加摧辱倘被告發書役則以誤漕爲詞挾制本官使爲緩頰該牧令卽以爲書役所挾制上司務求如其所欲而後已此民情之所由渙散者一也催科一端業已擾累不堪若別無擾累之處小民猶有生機無如遇有詞

訟悉置高閣棍徒因而無忌訟師因而播弄書役因而舞弊案中生案枝外生枝無端受累者有之人亡家破者有之設遇人命案件未經相驗先索陋規住離數里者指爲鄰佑毫無見聞者僉爲干證雖路斃必累多家遇緝兇則人皆正犯不將附近村莊資產蕩盡不已此民情之所由渙散者二也聽斷如此苟能嚴懲盜賊小民雖不暇日出而作猶可日入而息無如緝捕已成具文巡查不過索錢迨至盜賊竊發無不抑勒諱報若不遵依可欺者加以刑嚇難欺者指爲捏報輾轉提訊令其廢時失事贓盜並無一獲事主已受累無窮甚至因此挾嫌囑賊誣扳以爲挾制更可惡者捕役參竊得贓令其擇股售賣指贓爲證或牽入案中或得錢私和種種凌虐無惡不作此民情之所由渙散者三也牧令旣已如此營員兵丁亦無不以民爲可欺藉巡查則勒索商旅買食物則不給價值窩留娼賭引誘良家子弟包庇湯鍋代賊潛銷牲畜放營馬於田間名曰放青阻奪貨物於道路指爲偷漏盜劫案件則慙慙地方官扶同諱飾兵民涉訟則鼓脅衆丁羣起而攻此民情之所由渙散者四也有此四者官與民民與兵役已同仇敵良民與莠民亦成水火迨至激成事端不得不嚴行懲

辦以遏刁風民已焦頭爛額官猶詡詡自得揚言於衆曰江蘇民情柔懦安得鬧事更肆以酷濟貪欺壓良善自命爲能員每逢同僚會集所言惟缺分之優瘠浮收之多寡其風土人情從無過而問者設或於謁見時向其詢及地方利弊不過隨口支吾若向採訪人材其所好者皆係勾通書役出入衙門之輩其所惡者皆係不齒書役矯矯自好之人黑白混淆是非顛倒苟有一人不肯隨同附和不自之爲怪物即羣指爲見長多方排擠必墜諸淵遇有委辦事件無非敷衍塞責毫無實際甚或冒民之捐以爲己捐攘民之功以爲己功設有勸其腳踏實地者必答以此土非我世產但求陞轉善地而已自苦何爲視一官如傳舍置百姓於膜外以致吏治日壞民生日困民皆疾視其長上一朝有事不獨官民不能相顧且將相防困苦無告者因而思亂此實不能禦寇之由臣數月以來留心採訪實心任事者僅止寥寥數人而惟顧一己之私者比比皆是故臣於善後條款內首重慎選守令以收人心也惟積習已深劾不勝劾容臣會同撫臣督率藩臬兩司擇虐民之尤者嚴行指參愛民之尤者據實保奏示以懲勸仍嚴飭所屬各矢天良趁此民困已極之時易於感動先從約束書



役清釐詞訟嚴拿盜賊作爲下手功夫漸推而至於省刑罰薄稅歛俾良民爲  
我所用莠民亦化爲良雖有強寇當前而衆志成城彼亦無能爲役矣至於曠  
夷本係遠來窮寇我圍若固彼亦何敢鴟張而連年以來頻遭殘破其中殆亦  
有故蓋我之官兵情同烏合我之民心又皆渙散久已爲所窺破所到之處必  
先揚言專與官兵打仗與民無涉遇見民船必好言撫慰令其速避購買食物  
必十倍其價使之歆動旣陰囑毫無人性不甚愛惜之黑夷出外姦淫擄掠又  
准被害之人前赴控訴一經查實即斬之以徇且聞曾有奸民投遞書函歷數  
殷富之家意欲導之劫掠被其鞭責驅逐將書焚燬之事雖無確據而該夷之  
假仁假義要結民心事事反我之道而行之實屬信而有徵我之官員兵役猶  
存故智事事與民爲難何異爲叢毆爵此外攘之難於措手者一也該夷以船  
載兵遠涉而來並無退步一船有失全船性命皆付東流故其上下同心先懷  
必死之志以求不死我兵本非素練自閩廣浙江屢經敗衄之後業已聞風膽  
落勢常不敵且彼之長技在於大砲火箭二項其接仗時黑夷潛伏艙中身有  
所護目有所見裝藥下子又甚便捷白夷置身桅顛用測遠鏡窺定高下遠近

號令施放故能發無不中火箭即隨砲飛來延燒甚烈我之砲力本不如彼砲之致遠而船係活動之物又逆潮而上可以隨潮趨避我砲施放一出之後彼砲已接踵而來官兵容身無地不及裝藥再放是彼砲可以連環接續而我一砲止有一出發而中等諸無砲迨其登陸也兩軍苟能接戰我兵尙可用武無如砲聲未絕火箭即至彼兵即從烟燄中倏忽而前我兵應接不暇遂至披靡此外攘之難於措手者二也統計三年以來各省置備一切所請軍需業已不少不特新置者皆化爲烏有即本有之軍裝船隻砲臺亦多毀失從新做起經費實屬不資臣雖不敢因惜費而誤大計惟製造若不精良誠如訓諭臨時安能得力而欲期精良又非尅期可以奏功器械即已精良而兵多未練有械仍同無械此外攘之難於措手者三也禦寇之難又有此三者而旁觀議論聚訟紛紜主剿者莫不痛詆議撫之非及至剿而失利又歸咎於剿者之多事主撫者咸稱剿不足恃及至撫議旣成復不審度彼已欲圖一試取快目前若即令主剿者剿之主撫者撫之臨事之際亦皆一籌莫展苟非我皇上堅持定見計出萬全俾臣下有所遵循得以從容布置幾將事事掣肘不堪復問臣此次

籌辦善後於遵旨密爲預備之中處處示以無疑故於砲臺一項但請修復吳淞口之二座而不言添設蓋砲臺係排列前面之顯而易見者歷觀江浙兩省凡砲臺之有重兵駐守者悉被擊成齏粉而察看海隅江濱皆多蘆葦臨時必當於此等處設伏轟擊使彼瞭望不見躲閃不及方可得手但收拾民心訓練士卒造船鑄砲非一朝一夕可以奏效而切要機宜則在慎選守令將備使之教養訓練庶民志固兵氣振三年有勇七年即戎彼有限之游魂安敢輕視我無盡之兵民不戰屈夷久安長治全在於是臣受恩深重具有天良旣不敢以撫議爲可恃稍疎防備亦不敢以廢弛爲藉口諉過他人惟有臥薪嘗膽力挽頽靡得尺則尺得寸則寸或可日計不足月計有餘以仰副簡畀封疆之至意而實在情形不敢不直陳於聖主之前又恐稍有宣露更爲該夷所玩視謹恭摺密奏伏乞皇上聖鑒謹奏道光二十三年正月十八日硃批所論一切情形均非虛妄朕翻閱再三倍覺可歎可恨另有密旨

奴才耆英跪奏再奴才前因購得洋槍復交摺弁千總張攀龍恭齎進呈欽奉  
硃批朕親加對合大小均各有用內一母大小二槍筒大靶接小靶者可稱絕  
頂奇妙之品又六眼小槍靈捷之至但惜其無大者耳卿云仿造二字朕知其  
必成望洋之歎也欽此仰見聖明指示欽服難名並據該弁張攀龍回稱閏七  
月三十日軍機中堂大人諭令告知奴才將製造銅帽內之火藥方購得遇便  
密奏如奴才業已起身即告知總督祁大人又令告知奴才將洋火藥遇便再  
行進些並蒙天恩賞給伊大卷綢緞兩件等語伏念奴才仰荷鴻慈至優極渥  
今復恩及奴才齎摺差弁榮慚非分感悚愈深所有洋火藥現已覓得又購得  
六眼槍兩桿較前次所進槍筒長大亦屬靈便合用奴才帶回江南遇有便員  
卽行恭進惟製造銅帽內之火藥方其法甚秘一時不能搜求業已告知督臣  
祁墳設法購得卽由該督密行覆奏再奴才與督臣祁墳同事將及半年該督  
雖年逾六旬而耳目聰明步履輕健凡有會議事件危坐終日毫無倦怠心思  
細密計慮周詳每發一言必中窾覈非奴才所能冀及每遇函商之事該督必  
手書致覆周匝工緻無一懈筆泛語現當夷務甫定之時藉其老成鎮靜又安

海寓洵堪仰抒宸廑奴才謹縷晰附片奏聞伏乞聖鑒謹奏

片五

再臣耆英前因幫辦夷務乏人當將該道潘仕成奏請隨同辦理於道光二十四年六月欽奉上諭交臣耆英差遣委用該道籍隸粵東夷情甚爲熟悉且素爲各夷所敬信三年以來每遇各夷一有動靜飭令該令該道設法偵探無不立得其情僞並隨臣等屢赴澳門虎門等處接見各國夷酋均能贊勳駕馭動合機宜且心地醇實頗有膽識實爲夷務中必不可少之員現在諸夷雖已就範舟山全境收復大局底定似不致復生枝節但交涉事件所在多有夷情叵測仍須加意防維而熟悉夷務可靠之員又實難多得今潘仕成選平慶涇道缺遠在甘肅一經赴任距粵東幾及萬里遇有緩急調取爲難合無仰懇天恩俯念夷務重要俟該員引見時可否於附近廣東之江西廣西兩省選缺道員內量予對調庶臣等遇有應行委用之處得以隨時奏明就近劄調來粵實於夷務有裨臣等愚昧之見是否有當謹附片密陳恭候聖裁謹奏

片六

奴才耆英跪奏再奴才前因民夷漸形安帖及暎夷妄請准鴉片烟進口經奴才據約駁斥附片具奏奉硃批所奏均悉卿其善爲之應奏者隨時速奏欽此該夷自經駁斥之後兩月以來因租賃地基等事來文不下數十件於鴉片一事並未提及奴才意其爲正論所屈妄念或已漸消乃近因福州廈門等口有華商雇用夷船裝載貨物希圖漏稅情事經奴才據閩省來咨備文照會噶酋接據該酋覆稱偷漏稅餉之弊正是載鴉片不進口之船若准令鴉片進口不特多加噸鈔更增關稅而海盜及偷漏等弊一切盡除並阻紋銀出洋請爲代奏等語仍與以前疊次來文所言大略相同奴才以該酋爲此事求請前後不下數十次均經嚴爲杜絕今又藉端陳請是其妄念總不肯息但其語意並不急迫若復嚴加拒斥或恐激生事端當經奴才仍照前次復文之意婉爲答復能否從此絕念應俟該酋續有來文再行隨時具奏理合附片密陳伏乞聖鑒

謹奏

片七

奴才耆英跪奏再海外各夷情形不同而賦性則同一險鷲至逆夷啖咭喇尤屬萬分狡黠異常桀驁喜則似有人心怒則竟同犬豕寬之則求請無厭拂之則毒螫相加既智取術馭之皆窮亦理諭勢禁之不可奴才自受任辦理夷務以來遇有大小事件無不殫盡心力詳思熟籌不敢苟且偷安不敢鹵莽僨事忍尤含詬任怨任勞而夷情叵測既已竭控馭之方局外旁觀復不免非議之及寸私憤切飲泣吞聲恨不泥首闕廷一陳君父之前卽如此次逆夷突帶兵船要挾進城計其來者不過千餘人以省城兵力而論未嘗不可一加創懲稍舒積憤第大局一有翻騰邊衅驟起恐難收束且海疆各省兵力是否可靠防禦能否得力軍實能否敷用通盤籌畫實未敢輕於舉動連日與前撫臣黃恩彤委員趙長齡潘仕成及各司道等詳細熟商不得不忍之又忍姑與訂期兩年准予進城以爲羈縻弗絕之計而兩年後衆情是否允洽不致滋生事端區區之愚實難懸揣此皆奴才才識短淺措理失宜以致逆夷妄肆猖獗每一念

及憤不欲生現雖就範退出省河日後要求挾制仍恐不免奴才年逾六旬桑榆漸迫近年因一切辦理棘手日夜焦心精力大不如前加以氣憤所激肝鬱時作兩目時時脹痛左目尤甚勉力支持實形竭蹶奴才身受重恩苟有一息之存斷不敢稍存諉卸惟任關重大深恐一旦遽填溝壑將來接辦一時猝難其人惟有仰懇皇上聖明默簡才能預爲儲備以振國威而靖夷氛奴才雖糜頂捐軀無所復恨臨奏不勝憤泣待命之至謹附片密陳伏乞聖鑒謹奏

片 八

奴才者英跪奏再理財之道從古稱難今待用孔殷而庫藏短絀是理財又不可不首先講求者也伏讀邸鈔各衙門籌議裁減經費業已無微不至誠恐難濟亟需因思各省捐輸之人大都來自田間每以瞻觀天顏欽承宸翰爲不世之榮恭照高宗純皇帝南巡時召見衿耆寵頒御筆至今揚州一帶民間猶世守寶藏欣羨不已邇時商富遇事輸誠動輒以數十百萬計現在情形雖非復曩時可比而其一種眷戀欽慕之忱仍無異於往昔倘蒙遇有情殷報効不求



仕進之人准各該督撫查明捐數較多者奏請於照例賞給虛銜之外錫以御書匾額或福壽等字聞風興起者定不乏人又近年以來捐輸經費人員雖蒙逾格施恩但得缺無期未免擁擠立賢本屬無方此中未嘗無可用之材可否仰懇天恩諭知各該督撫查明各項捐輸人員已奉賞給道府候補候選者即造冊咨送軍機處並飭各該員即日進京預備召見以遂其瞻仰之忱俟其到京時密飭敬徵妥爲照料敬徵係戶部尙書理財是其專責必能使之輸忱報効以濟餉需迨奉召見後應候選者仍舊歸部應候補者發回原省就中察其材具可用每項簡用一二人使之由而不使之知爲該員等夢寐所不及於大體既屬無妨於國計實有裨益內外諸臣果能辦理得宜不獨捐輸經費必將爭先恐後卽遵例報捐亦必日有起色奴才愚昧之見是否可行謹附片密奏伏乞聖鑒訓示謹奏

摺 二

奴才者英跪奏爲奏聞事竊奴才抵粵年餘見廣州將軍奕湘心地明白閱歷

有爲歧黃形家均皆通曉茲蒙簡調盛京將軍奴才將該處一切積習詳細告知俾奕湘不致爲積習所愚再奴才前在盛京將軍任內曾經親至草倉河一帶地方詳細履勘恭查永陵水道似須將草倉河來水仍由東引至西流滙歸大河爲妥風水攸關不敢率請辦理又鳳凰樓尊藏聖容亦應奏明妥議彼時奴才再四思維未敢冒昧繕摺陳奏擬俟年班進京縷晰面陳詎道光二十二年奴才仰蒙天恩簡調廣州將軍迨進京後復蒙派令馳赴浙江辦理夷務是以未敢率陳茲將軍奕湘調任盛京奴才將一切情形敬謹告知奕湘自應面奏請旨遵辦庶奴才葵藿愚忱藉得稍抒萬一理合恭摺具奏伏乞皇上聖鑒再奕湘於十月二十七日由廣州起程合併陳明謹奏道光二十五年十月二十九日

片九

再夷目嗎嚙嚙生長廣東居心狡詐善能窺伺內地一切情形又能通漢語習漢字連年以來陰謀詭計主持其事者雖不止伊一人而多半聽其指使實爲

罪魁今因積惡貫盈竟伏冥誅凡有知識者無不同聲稱快從此消除一害無虞出我範圍洵足仰慰聖懷奴才謹附片密陳謹奏

片十

再連年以來陰謀詭計雖出於已死之嗎嚙嚙而圖占香港之謀則發於該國奸商嗎呢該奸商富有資財善於壟斷首先在香開墾基地建造房屋將爲頓販貨物鴉片之地積惡旣稔覆載不容於六月中先嗎嚙嚙而死接辦奸商嗎呢事務之人相繼亦故嚙呢妻子隨拋棄房屋移至澳門居住又自七月中旬至閏月上旬香港死亡夷兵數百名嚙嚙喳及著名各夷目皆於七月中避居澳門嚙會於九月始回香港經大鵬協都司查明稟報撫臣程喬采有案復經奴才密加訪查事皆屬實是香港之神奸巨惡先後漸伏冥誅地無富商即難成市華夷商民又因地勢不吉視爲畏途似此情形無虞爲售貨置貨之總匯奴才謹附片密陳伏乞聖鑒謹奏

片十一

再奴才前奉諭旨以撫臣徐廣縉是否堪以辦理夷務據實具奏等因當以該員甫經到任其能否未克深知卽就彼時察看情形於四月間具摺覆奏數月以來仍不時留心察看該員於夷情漸能熟悉現辦民夷互毆斃命一案尤確有定見堪資倚畀知關聖廬合併附陳竊念奴才自辦理撫夷將及七年初時精力甚健因夷情叵測事多棘手晝夜焦灼寢饋難安以致肝氣時發眼昏頭暈每形委頓其所以千迴百轉幸免決裂者實賴前任撫臣黃恩彤贊助之力久蒙洞鑒是以該員前在巡撫任內奴才出省遠赴廣西閱伍亦可放心迨該員妄行陳奏革職仍奉旨留粵差委旋賞給六品頂帶該員知懼知感一年以來將任內經手未完之屯田礦山保甲及九龍捐輸各要務會同司道一律趕辦完竣至本年二月十一月民夷兩次構衅幾成事端該員均能悉心籌畫於輕重緩急隨時商權俾得化爲無事實屬始終不懈該員雖非本省司道惟係奉旨交奴才差遣委用之員現屆年終註考之期奴才亦不敢壅於上聞抑奴才更有慮者粵東民悍夷驕動輒滋事辦理稍失其宜衅端卽從此啓且各國

番舶聚集交涉事件不一而足非精神十分周到機宜難期悉合奴才自上年以迄於今鬚髮盡白肝疾日甚心氣尤虧初猶止於眼昏近則不時流淚初猶止於頭暈近或猝然眩倒雖時服疏解之劑力疾辦公而衰態日增精力日減實有難以久支之勢奴才受恩深重即捐糜頂踵不能仰報萬一何敢畏難苟安輒思引退惟以孱軀而當重寄時虞隕越彌切憂惶不得不瀝陳於聖主之前伏乞慈鑒為此附片密陳謹奏

片十二

按恩彤字石琴山東寧陽人道光六年進士二十年出為江南鹽巡道遷按察使江寧布政使江寧和議恩彤隨同定約復隨伊里

布赴粵籌議通商旋調廣東按察使遷布政使二十五年就擢巡撫二十六年視職交著英差遣光緒七年卒

臣黃恩彤

跪奏再臣等於六月十二日據澳門同知吉泰等稟稱六月初九日

有吡嘯哂國巡船一隻來泊澳門探係該國使臣喇嚙呢由呂宋駛回等情旋接該夷使照會內稱伊現由呂宋回澳接閱臣等前此發給照會知所議貿易章程及習天主教為善之人請免治罪之處俱蒙大皇帝施恩允准不勝感激伊接國中來信所有寄回前定章程國主業經議准已交嘍咧齋帶前來一

俟接到立即訂期互換面爲妥辦等語臣等查閱該夷使來文詞氣甚屬恭馴惟必須約冊互換該夷使回國後臣等方敢釋然於心當即備文照覆宣布皇上德意以示懷柔容俟該國約冊到粵再與訂期互換妥爲辦理至哂夷強留執事通事二人在琉球國一節臣等前飭即選道潘仕成向住澳之該國夷人咖嚶喇探詢據云風聞前留執事等二人業已回國惟該夷亦係得之傳聞未爲確據容俟會晤喇嚶呢再向查詢的確據實奏聞所有哂嚶晒夷使喇嚶呢回澳緣由理合附片具奏伏乞皇上聖鑒謹奏

片十三

臣耆英跪奏再臣督同司道等查訊潮橋運同長庚及署運同李敦業被參各情業經繕摺據實陳奏惟核之定例多有不符卽如定例先餉後鹽而歷來外辦章程則拆引在前徵餉在後定例奏銷銀冊並解而歷屆均係虛報徵存陸續完餉其李敦業尙有未繳二十年奏銷案內攤賠缺餉銀二萬餘兩遽請暫行開復長庚業經開缺近閱邸鈔部選有人輒請暫留職任均屬必干部駁臣

亦非見不及此惟是詳稽檔案體察情形殊覺法有所窮似宜權乃獲濟查潮橋奏銷自嘉慶二十四年以後遞請推展十五年奏明每年照例限贖早一月計自十六年四月辦理十三年分奏銷起至二十三年八月應辦二十一年分奏銷止共歷奏銷九次業經贖早八月以致二十一年奏銷僅留三月之限拆引輸餉週轉不及李敦業又於兩次水災之後商力愈疲一籌莫展長庚亦因限期迫屆無可通挪遂致虛爲冊報暫顧目前此猶前此之竭蹶不堪而未計及現在之窒礙難行也查二十一年奏銷請展已於二十三年十二月二十八日接奉部文駁飭不准按奉駁之日扣除轉文造冊程期計至二十四年四月二十七日早屆限滿而所拆之引未及十分之三遽欲催商繳餉已屬勢所不能況二十二分之奏銷核扣定限七月卽已屆期以月日考之是二十一年奏銷尙有三月之限二十二年奏銷更無一月之期三月而拆一年之引旣斷難足額一月而拆一年一引更無從措手此即暢銷埠岸已有必須通融之勢况潮橋積疲已久疊被水災若執法相繩必致一蹶弗振臣竊維鹽務以餉課爲重而欲參員彌補缺餉必須留其一官俾令有所顧惜方能設法措繳是以定

例地丁鹽課等項參後續報全完俱准開復留任即因公挪移倉庫錢糧完日亦准開復例義深微並非寬於虧空之員實乃預爲補苴之地臣之所以請將李敦業暫予開復者實因查明二十年奏銷案內該員應銷引五百八十五程應完正餉銀九萬七千二百餘兩除先已解過六萬兩外被參後續解銀四萬二千五百餘兩按引計餉已有增多且尙有未拆引一百八十餘程若但予以情銷之咎轉致卸其賠餉之責是以一概不准扣抵其報解之懸埠缺餉籌欸撥補銀二萬二千八百餘兩又隨欸部飯銅斤水脚等銀二千八百餘兩亦復催令趕緊解清不肯寬予限期統而計之該員僅止實銷四百程之引而已認繳原額八百餘程之課若再不爲暫請開復不惟衡情未得其平且恐罷斥之員設措更形束手於餉欸仍無裨益至長庚名下應解之餉雖尙不甚鉅但查十九年奏銷係該員任內經徵李敦業既經續爲解清則二十一年奏銷係李敦業任內經徵該員亦應代爲補還與其束以成法致前後互相觀望孰若求諸實在俾彼此無可推諉且二十一年奏銷業經逾期二十二年奏銷又已屆限若於此時遽易生手畏事者必致自甘暴棄引疾乞休即有任事之員亦必



持到任後按日拆引徵餉之說自顧考成而以二十一年奏銷應徵之餉諉諸李敦業以二十二年奏銷應徵之餉諉諸長庚是時將欲強之代納則彼將據例以爭若任其諉歸前任則兩年奏銷二十餘萬之餉歛盡歸無着所關匪細似不若責成長庚一手經理庶該員既顧目前之大局復冀將來之開復必不致甘心惰悞自罹嚴譴至二十一二兩年奏銷同時屆限勢難併力拆輸將欲兩顧必致兩悞惟有將二十一年奏冊按限具題即照臣前摺所議責成長庚趕拆新引陸續增解其二十二年奏銷不得不量予推展應由運司查照歷屆成案另行詳請具奏臣甫經到任無所用其廻護惟受恩深重現當制用孔亟不得不首重餉欸既經將本案查訊明確再四熟籌實有格於時勢必須量爲變通之處不敢引嫌拘泥緘默不言倘部中執定例議駁仰懇皇上破格施恩庶本案之餉欸不致虛懸而後此挽救之法亦得次第措置謹附片瀝陳伏惟聖鑒謹奏

協辦大學士兩廣總督奴才耆英跪奏爲遵旨籌辦並據實密陳仰祈聖鑒事  
竊奴才於道光二十七年四月二十日承准軍機大臣字寄道光二十七年三  
月二十九日奉上諭國家設兵衛民雖可百年不用不可一日不備全在封疆  
大吏於無事之時籌久遠之計平日留心營政選擇將材事事皆有把握設遇  
有事自可隨機策應措置周全粵省近年以來海氛甫靖經朕再三訓諭思患  
豫防上年又經耆英疏陳練兵籌餉事宜已通諭各省督撫體察情形妥爲籌  
辦耆英身任重寄諒能仰體朕意通籌大局計出萬全斷不至稍形疎懈惟粵  
省民情浮動加以諸夷雜處易啓爭端多非意料所及儻遇有需用之處徒恃  
本省兵力既恐防範難周若向他省調兵又慮鞭長莫及惟廣西地界毗連且  
同屬該督管轄呼應較靈著耆英接奉此旨卽於廣西鎮將中留心察看擇其  
實能訓練士卒者責令不動聲色認真操演務使技藝精熟紀律嚴明其有壯  
健驍勇可稱勁旅者密爲存記約共豫備二三千名一遇有事調遣卽令剋期  
就道毋至臨事張皇是爲至要此外各省惟江西最爲切近已諭知李星沅密  
爲經畫以備不時調遣凡此皆於平時操演之餘寓先事防維之意於粵省籌

備機宜更有裨益至前次夷船突入省河時何以夷兵遂得偷上礮臺釘塞礮眼自因該處弁兵防守不嚴之故除飭查明懲辦外以後應如何嚴密防範方不至再有疎虞亦著妥爲籌議具奏再粵省情形必須經理得人各省大員中如有器識才具堪勝重任爲該督所深知者並著據實密陳候朕酌用將此諭令知之欽此伏讀之下仰見皇上殷念海疆預爲籌備至意曷勝欽感伏查廣東一省額設水陸兵丁統共六萬八千三百餘名除督撫提鎮各標協營分布各府州縣及分防各汛礮臺外駐省兵丁僅止二千四百餘名形勢實爲單弱遇有緩急誠如聖諭恃本省兵力旣恐防範難周若向他省調兵又慮鞭長莫及而粵省民情浮動諸夷又復錯雜其間意外之虞殊難逆料不得不爲未雨綢繆之計是以上年奴才巡閱廣西即密囑廣西提臣馬殿甲預爲挑選精壯勤加訓練以備緩急之需茲蒙皇上明炳先機飭於廣西鎮將中擇其實能訓練士卒者責令認真操演預備二三千名以供調遣廟算周詳實深寅佩並蒙密飭兩江督臣於江西省密爲經畫以備不時調遣奴才會任兩江總督深知江西兵額雖屬無多而九江南贛等營素稱勁旅距粵亦不甚遠有事調遣

更足以壯聲威是皆聖主神謨廣運周悉靡遺仁覆粵海巖疆指示萬全勝算  
奴才惟有敬謹秉承實心辦理期於籌備有裨不敢稍形疎懈至虎門海口及  
內河沿途各礮臺形勢已爲聯絡惟各臺駐守兵丁尙須酌量配置以資防範  
現擬分別最要次要勻撥弁兵分防駐守前已附片奏明在案其守臺兵丁技  
藝必須常川認真訓練庶幾熟者不至生疎生者日漸純熟惟恐營員日久懈  
弛虛應故事現在議定每月各臺演放礮位皆由奴才派委誠實可靠文職大  
員前往監同演放務使實力操演緩急得有所恃再粵省現在情形實須經理  
得人各省督撫將軍俱蒙特簡其器識才具皆在聖明洞鑒之中奴才何敢妄  
參末議至各省司道大員奴才限於見聞實亦未能周知惟仰蒙溫諭垂詢奴  
才受知至深受恩至重揆諸以人事君之義自當殫竭愚悃以冀仰酬高厚於  
萬一謹就平日所知各員據實密陳伏候採擇查雲貴總督林則徐四川總督  
琦善直隸總督訥爾經額閩浙總督劉韻珂兩湖總督裕泰兩江總督李星沅  
皆才閎識遠經猷夙裕歷任疆圻允堪重寄惟現在所居省分均屬緊要之區  
山東巡撫崇恩才識開展措置有條前在江寧藩司任內奴才知之頗稔惟嫌

其精華稍露比已閱歷有年諒可漸臻穩練福建巡撫徐繼畬精明勤慎處事周詳雖性情稍覺柔和然在閩辦理夷務實爲妥協吉林將軍經額布由巡撫歷任將軍嫻於武備伊犁將軍薩迎阿由司道洊任卿貳明練老成惟均年齒較大未知精力能否如前盛京將軍奕湘前在廣州將軍都統任內頗久辦理旗營事務甚爲妥協但於地方諸事未知能否熟悉至各省司道如江蘇按察使宮慕久精明諳練前在蘇松太道任內辦理夷務夷情頗爲悅服蘇松太道咸齡任事勇往前隨奴才辦理夷務嗣又委令收復舟山亦爲夷人敬信廣東布政使葉名琛明敏開展幹練有爲廣東按察使李璋煜穩練結實辦事認真廣東督糧道趙長齡任勞任怨有識以之經理粵省事宜均堪得力再六品頂帶委員黃恩彤隨奴才襄辦夷務有年於夷情向背均能周知操縱機宜素所講求歷任廣東藩臬巡撫地方情形尤爲熟悉雖現經獲咎而曾任大員且奉旨留粵差委奴才實資指臂之助是以不敢壅於上聞此外現無平日深知之員未敢冒昧具陳所有奴才欽遵籌辦並據實密陳緣由理合恭摺密奏伏乞皇上聖鑒謹奏道光二十七年五月初四日

奕

山允禩四世孫授乾清門侍衛道光七年擢頭等侍衛歷伊犁領隊大臣

大臣二十一年御前命大為靖逆將軍督師廣東尚書旋文提督楊芳為參贊副禁

宗人府空室二十三年釋之予二等侍衛充和闐辦事大臣調伊犁參贊大臣

臣署將軍二十七年調葉爾羌參贊大臣尋授內閣學士調伊犁參贊大臣

將軍九年授伊犁將軍威豐元年與俄人定伊犁通商章程五年調黑龍江

正紅旗蒙古副統同治中封一隆文滿洲正紅旗人嘉慶十三年進士改

等鎮國將軍內大臣以疾罷隆文刑部主事授翰林院侍講累擢內閣

書軍機大臣充駐藏大臣偕奕山督師廣東意不相合甫至卒於軍怡良

滿洲正紅旗人刑部筆帖式洵升員外郎道光八年出為廣東高州知府歷

雲南鹽法道山東鹽運使安徽江蘇按察使江西蘇布政使十八年擢廣

東巡撫禁烟事起林則徐鄧廷楨主之怡良偕預其事及琦善至粵疏請撤

防議撫怡良及將軍阿精阿皆不列銜二十一年琦善私許英人通商並割

葉香港怡疏請許貿易奪職留任旋授欽差大臣會辦福建軍務調閩浙總督兼

署福州將軍兩江總督暫駐常州七年以病乞免同治六年卒

奕山等片

再奴才奕山隆文楊芳等奉命督師赴粵攻勦曠夷奴才阿精阿臣祁墳臣怡良奴才裕瑞等均有地方城池之責無日不思痛殲醜類以彰天討而快人心

奕山等

史料旬刊

何敢妄作權宜之舉第有不得已之苦衷不能不直陳聖主之前者粵東用兵攻守之難約有八端先經奴才楊芳密陳聖鑒嗣奴才奕山奴才隆文抵粵後悉心體察省河左右咽喉皆爲所守溯查廣東與各國通商近二百年凡夷人之性情嗜好粵人無不周知而沿海居民暨漁船蛋戶往來潮汐中尤與夷人相狎言語皆通嗜利好鬪輕去其鄉所以夷人不惜重貲覓爲使令遂至死心向外惟命是從暗通消息無所不至雖屢經捕獲立即正法而混跡市廛無可辨認更有僞製兵丁號衣雜入行陣或首先奔潰或戕害弁兵詭詐多端甚而謀爲內應幸先事密拿駢誅示衆先經臣怡良於二月間刊示開導宥其既往許以立功自效奴才等又將賞格加重許以自新勸諭再三投回者卒鮮兼之水路礮位失散無餘水師無兵可調陸兵臨河禦敵夷人礮火猛烈所恃者土堆沙袋胎絮牛皮而積至丈餘猶能洞徹是以守兵往往立脚不住現在所調官兵一萬七千餘人將弁久歷戎行士卒亦皆用命無如粵東旣無戰地又難安營熱爍濕蒸久而多病除佛山石門分防之外可用者不過十之七八此次夷船長驅直入攻擊省城官兵猶能奮不顧身相持數晝夜無如漢奸煽惑人

心不固而夷匪既南逼河岸又北踞山巔居高臨下全城在目勢甚危急奴才等蒙皇上蒙養之恩授命疆場一身何足顧惜獨念城中數百萬生靈何辜遭此荼毒且省城重地倉庫監獄最關緊要一有疏失收復固難而各路土匪乘機竊發通省動搖更不堪設想總之形勢既難久守百姓日愈驚慌是以城內居民率衆籲求哀號請命奴才等再四思維若不權宜行事必至十分決裂罪尤難道但奴才等未經先爲陳奏候旨遵行實因迫於情勢未能久待而種種辦理錯謬之罪百喙難辭應請旨將奴才等交部從重治罪謹附片密陳伏望留中伏乞聖鑒謹奏硃批覽

楊

芳

字誠齋貴州松桃人小有幹略入伍充書識楊遇春一見奇之荐補把總從征苗疆擢守備嘉慶二年從額勒登保剿敵匪轉戰川陝連破劇寇

冠四年擢平遠營都司下江營游擊兩廣督標參將五年擢廣西新泰協副將六年擢陝西寧遠鎮總兵十一年代楊遇春署固原提督旋以蒲大芳之變坐馭兵姑息褫職遣戍明年釋還十五年授廣東右翼鎮總兵調陝西安鎮母憂去官十八年授河北鎮總兵調西安鎮漢中鎮二十年擢甘肅提督道光初歷直隸湖南固原提督六年回疆軍事急芳請從征許之有功七年督錫封三等果勇侯晉御前侍衛十三年代四川提督逾年御前侍衛以甘肅總兵候補十六年爲湖南鎮總兵歷廣西湖南提督二十一年春命奕山爲靖逆將軍芳及隆文爲參贊率師赴粵防剿芳以戰不可恃與怡良

楊芳

史料旬刊



合疏請許英人貿易被議旋回湖南  
本任二十三年致仕二十六年卒

片 一

再奴才兼程到粵已在虎門烏涌節次失守之後逆船悉入內河一切布置經  
營措手不及自荷聖明洞鑒且奕山隆文俱尙未到奴才膺茲重任惟有殫精  
竭慮設法挽回而實在情形有不敢不密陳於聖主之前者伏思應變隨機兵  
不厭詐急脈緩受忍以成謀大抵制敵之方時而鬥力時而鬥智亦就其勢以  
圖利便耳刻下嘆逆在粵如劫盜業已入室事主先被網縛設使其縛未解即  
智力亦無所施而所以解其縛者不得不馭之以詐而成之以忍蓋水戰爲逆  
夷長技而在我則師船已被焚燒大礮又皆淪失是水戰之具彼有我無非僅  
彼利我鈍已非倉猝所能取辦一難也岸上紮營固甚嚴緊而以禦其在水之  
船我有定所彼無定形遠近趨避之間未能盡有把握二難也自沙角大角失  
事以後粵省官兵屢經挫衄心渙膽寒而本地漢奸之多更難保不混入其中  
語音莫辨則主兵不可信用三難也幸蒙皇上洞燭幾先早已飭調外省官兵  
來粵俾奴才仗此兵威諸事得以應時預備否則奴才愈形束手矣即如日前

鳳凰岡接仗江西南贛營兵尙能擊退夷船而川黔鎮守各兵尤稱勁旅誠堪  
得用惟甫到即須禦敵地方形勢一時未及盡覘尙患人地生疎四難也粵東  
本富庶之地省垣尤繁會之區紳士商民似皆力能自守乃有一種積習寇尙  
未來業已紛紛遷徙雖經大小官吏剴切示諭仍無固守之心十室九虛焚燒  
可慮五難也內城向稱老城堅厚雄壯自可無虞而南面之新城總督海關衙  
門皆在其內城墻甚爲單薄且瀕臨河口即添兵亦未易固守六難也其省外  
水陸情形奴才尙未周覽欲爲區畫必待足到心到而逆船近在肘腋不能舍  
此顧彼七難也浙江定海繳還之後逆夷均由浙洋回至粵省人船愈衆逆焰  
愈張八難也奴才恨不滅此朝食而反覆籌思恐有欲速不達之患則莫若先  
設一計以退其船查從前該逆夷求償煙價求給地方皆無可許之理今俱不  
敢妄圖而惟希冀照常貿易一事雖其居心叵測眞僞難知然夷人圖利是其  
恒情彼若以詐來奴才亦即以詐應之將計就計冀其墮入術中於勤辦或稍  
有把握第愚昧之見未知當否除俟奕山隆文到粵公同熟籌外謹瀝下忱附  
片密陳伏候聖主訓示再此件密片關係夷情伏求留中謹奏

片二

再熟籌此事或疑將來挾勢逞刃不但香港難禁其不據而沿海處處備禦鞭長莫及不無後患奴才體察夷情注意在利利在廣東廣東陸路保障既固使該夷船礮無所施其伎倆嗣後如有敢於復生枝節何夷放肆即專絕何夷通商是廣東幅幘保障即香港保障更沿海之保障也可以理必可以勢定是以一面誘其退遠趕緊於大黃濬壘石塞斷河道截山爲臺駐兵拒守使舟揖不通一面於獵德以內亦截山爲臺穿插對壘石隄使舟行紆徐賊船難入另用兵往堵虎門內河爲全省大端保障立俟奕山隆文趕到熟籌勦辦謹再附片密陳謹奏

梁章鉅

道光十五年授甘肅布政使十六年調直隸四月授廣西巡撫二十一年閏三月調江蘇十二月病免

摺一

廣西巡撫臣梁章鉅跪奏爲密陳藩臬兩司不能和協緣由仰祈聖鑒事竊廣

西藩司花杰於道光十四年三月到任臬司宋其沅於道光十五年八月到任臣莅粵之初卽聞該司二人各有意見屢致齟齬臣以同寅必須和衷而平心始能平政凡遇公事無不督率該司等破除成見開誠布公以期斟酌盡善該司等幸能用命毫無間言合省吏民僉謂和氣致祥爲此二三年中所未有之景象乃自數月以來該兩司議論又多差池不覺故態復萌各有忍不能遏之勢伏思在官言官原不妨各抒所見愈加辯論則是非愈明如果兩人所爭一非一是臣固不難以正理折服其非甚或一公一私臣更不難將營私者立與參奏乃臣悉心體察並咨詢輿論則該司等所爭往往皆有一是皆係爲公祇緣各有成見在胸牢不可破遂至相持不下徒滋口舌之紛現在會議會詳之案未免多所擱延府州縣以下諸凡難以稟承於政務殊多窒礙臣愚以爲如花杰之高明宋其沅之沈潛各有好處在兩司中尙爲得力之員惟意見既不相能合之則兩傷離之則雙美理合據實直陳於聖主之前可否將藩司花杰臬司宋其沅兩人中與他省藩臬對調一人來粵俾臣得資臂指之益出自皇上天恩臣深慙德薄不足以感人但爲慎重公事起見不敢不密行具奏伏乞

皇上聖鑒訓示謹奏道光十七年九月二十四日

摺 二

調任江蘇巡撫臣梁章鉅跪奏爲遵旨據實密奏事臣於六月二十九日在湖北黃州府途次接到軍機大臣密寄道光二十一年六月十三日奉上諭朕聞廣東辦理夷務四月初一日官兵攻擊夷船初二日該夷駕火輪船一隻駛至省西泥城一路開礮兵勇望風而逃被燒船隻六十餘號初三四五等日逆夷駕船十餘隻開礮攻打上岸防兵四散遁走被燒民房甚多占去四方礮臺經廣州府知府余保純向逆夷面議息兵初十日有鄉民數萬人圍困義律等衆功在須臾因余保純得義律私書出城彈壓鄉人始漸解去逆夷將大角沙角橫檔等礮臺輒石移往香港起造馬頭房屋又於香港潛開大路一通香山一通惠州各等情如果屬實是該處情形所聞與所奏迥異梁章鉅前駐劄廣西梧州府城與廣東毗連且正值軍務喫緊之時文報相通務將所聞實在情形詳晰具奏朕於他處亦有飭諭密查該撫不准稍有含混自取咎戾將此諭令

知之欽此臣捧讀之下仰見我皇上明察所及無遠弗周曷勝欽悚臣在廣西巡撫任內一聞廣東暎夷滋事因係唇齒之邦即專派文武員弁前往東省守探確情隨時稟報彼時琦善剛愎自用專以鉗制人口爲能是以外間毫無確信自琦善離粵後文報始通就臣在梧州時訪悉情形皆得自遷來商旅之口證以各員弁所遞報單及此次恭奉諭旨所開並無歧異臣思此次開門揖盜咎在琦善而受其指使者爲余保純今琦善雖獲重譴而余保純正在用事自難免外間浮議而現在辦理軍務又復上辜國恩下失民望徒成笑柄萬口同聲此後香港一節尙不知作何收拾臣旣蒙垂問斷不敢稍存含混壅於上聞謹將臣在梧州所接員弁報單自閏三月以後各原紙檢齊因封密呈御覽即可得實在情形所有臣密奏緣由伏乞皇上聖鑒謹奏道光二十一年七月初

三日

黃爵滋

字樹亭江西宜黃人道光三年進士遷御史給事中以直諫負時望十五年特擢鴻臚寺卿疏陳英吉利船艦屢至閩浙蘇魯洋面游弋測繪

山川地圖十八年上禁烟議重治與販吸食之罪疏上宣宗深韙之下疆臣速議章程旋擢大理寺少卿通政使禮部侍郎調刑部二十年偕祁寯藻赴

福建查辦禁烟二十二年丁憂去官二十三年銀庫虧空事發追論管庫查  
庫諸臣罪皆褫職責賠賠足次第予官爵滋以員外郎候補三十年至京會  
出逾三年卒

摺一

刑部左侍郎臣黃爵滋跪奏爲恭進海防圖表仰祈聖鑒事臣惟海防之設所  
以遏內地之奸萌杜外夷之窺伺非綜攬全局深明體要不足以操成算而利  
永圖我朝自康熙年間舟山東臺以次廓清陬澨恬謐者垂二百年伏查海疆  
萬餘里自奉天以迄廣東瀕海郡縣縮波而治近則守口岸以固門戶遠則扼  
山險以壯藩籬各營水師巡洋會哨凡沙綫暗礁風期潮信莫不漸推漸準愈  
久愈精蓋中國沿海省分各有天設奇險以爲捍衛凡洋船遊奕樵汲皆有一  
定島澳至近岸港路較僻非本地引水不能知其淺深曲折特承平日久在事  
文武諸臣未免狃天險爲可恃習柔遠爲故常一切防海事宜有名無實卽有  
舉動不以爲兵力難施則以爲經費易絀不思沿海列營相望水陸分防互相  
策應立法至爲周備今第就海籌海惟首先覈實兵額使一兵有一兵之用則  
國帑旣鮮虛糜客兵亦無煩徵調况海民漁戶人人皆可帶甲灘蕩田圩處處

皆可興利者乎臣前奉命出使東至山海關南歷浙閩每遇習熟洋事之人逐一訪求粗識形勢顧嘗稽諸圖志互有不符推原其故或圖限尺幅或志有傳譌更兼潮汐灘漲塘汎遷移口岸則彼此易地山險則左右易嚮水道則遠近易程若執以定方隅更多不合謹就見聞所及詳加參考欽遵內府地輿圖式一本天度開方彙成海疆全圖其水陸營鎮以及口岸山險水道分類標註別爲一表便於省閱臣自知才識謏陋無當萬一惟仰見我皇上鑒徹瀛壖神籌機要一稟列聖舊章控馭中外誠得人以治之及今整頓猶易爲力則臣斯製固亦銜石之愚誠而測蠡之末効也謹校定繕寫恭呈御覽伏乞聖明訓示再圖分上下二冊謹依海疆形勢轉折寬狹用疊幅伸縮以取定向上冊由北而南下冊由東而西俱係左開合併聲明謹奏道光二十一年六月二十七日